



Chistiona su Sardu!

Letzione N.11

Su tempus

Maistra: Si faeddat de su tempus chi faghet e de sos tempos de festa in bidda.

Giuanne: Oe est una bella die de sole. Andades a mare?

Lio: Apo bidu sas previsiones e a sero poniat annuadu.

Lughia: A mie mi paret chi est pesende-si su bentu.

Marisa: Su mare in custos tretos si àgitat in presse e est perigulosu. Andat bene abarrare inoghe puru. Est una bidda ermosa e nch'at un'àera bella.

Giuanne: No ant a mancare àteras ocasiones pro andare a mare de seguru. Deo mi nche depo fuire. So foras totu su sero. Nos bidimus notesta.

Lughia: Non faghent nudda ocannu pro su santu? O su comitadu est dormidu che a semper?

Micheli: Pro pedire su dinari già sunt colados... lampu! Ant tentu su coràgiu de nde pedire a mie puru!

Lio: Mancari fiant brullende.

Micheli: Ei, brullende brullende e sèrios sèrios cun su cartulàriu in manu. E deo sèriu sèriu l'apo naradu chi fia ispiantadu, finas si carchi soddu in butzaca lu tenia.

Lio: Mi paret chi organizzant un'addòbiu pro giòvanos cun unu grupu rap e unu rock.

Lughia: E in ue? Ispero chi non lu fatzant in pratza de crèsia che a s'àtera borta!

Lio: Non creu, si nono l'intendes su vicàriu! Penso chi siat foras de sa bidda.